



Inatsisartunut Ilaasortaq Otto Jeremiassen

Naalakkersuisunut apeqqut Inatsisartunut ilaasortamit Otto Jeremiasenimit, Siumut

Inatsisartut Suleriaasianni § 36, imm. 1 naapertorlugu Inatsisartunut ilaasortaq Otto Jeremiassen Siumup allagassiai atorlugit Naalakkersuisunut napparsimmaveqarfiup napparsimasunik angallassisarnera pillugu apeqquteqaateqarpoq.

Apeqqutit imatut oqaasertaqarput:

Ukiut 2-3-t matuma siornatigut tusagassiuutitigut nalunaaruteqartoqarpoq piffissami sivisuumi ilaatigut Aningaasaqarnermut Ataatsimiititaliamit malersoneqareerluni peqqinnissaqarfik Air Greenland-nilu napparsimasunik angallassinermut atatillugu isumaqatigiittoqarsimasoq. Tamanna tunngaveqarpoq napparsimasunik angallassinermi Nunatta karsianut aningaasartuutit 100 mio. kr. angumalersimagaat. Taamani aamma nalunaarutigineqarpoq ukiortamiit 2008-miit nalilersoqqinneqarumaartoq, tamannalu tunngavigalugu uku apeqqutit paasisaqarfigiumagaluarpakka.

- Taamani nutaamik isumaqatigiissusiornermiit aningaasartuutit qanoq ineriartorsimappat?
- Siornamut sanilliussilluni qanoq aningaasartuutit annertutigippat?
- Taamani suliariumannittussarsiuussisoqarpa?
- Tamaattoqarsimappallu kikkut neqerooruteqarpat?
- Neqeroortoqarsimappallu akitigut qanoq neqeroorutit nikingassuseqarpat?

Akissut:

Aallaqqaasiullugu nalunaarutigisinnaavara Peqqissutsimut Naalakkersuisoq Inatsisartut Aningaasaqarnermut Ataatsimiititaliaanut 2006-imi 21. februar aamma 2006-imi 15. september napparsimasunut kiffartuussinerup sillimanissallu pitsannorsarnissaa kiisalu napparsimasunik angallassinermi aningaasartuutit qaffanneqarnerat killilerniarlugu Peqqinnissaqarfiup timmissartortitseqatigiinnik isumaqatigiissutai pillugit nassuiaateqarmat.

13.06.2008
J.nr.

Postboks 1160
3900 Nuuk
Oq/tel +299 34 50 00
Fax +299 32 55 05
peqqip@gh.gl
www.nanoq.gl/peqqik

AIS 06-mut aamma AIS 07-mut atatillugu taakku Aningaasaqarnermut Ataatsimiititaliamit apeqqutigineqarput.

2006-imi februarip 21-iani Peqqissutsimut Naalakkersuisup Aningaasaqarnermut Ataatsimiititaliamit apeqqut una akissuteqarfigivaa:

”Napparsimasunik angallassinermut akissaajaatit appartinneqarnissaannut misissueqqissaarnerit killiffiat pillugu Aningaasaqarnermut Ataatsimiititaliap ilisimatinneqarnissani kissaatigivaa, Aningaasaqarnermut ataatsimiititaliamit paasineqarmat taamatut misississueqqissaarnermut paasissutissat ukiuni arlalinngortuni missingersuutinut ilanngussanut ilaatinneqartartut.”

2006-imi februarip 21-iani Peqqissutsimut Naalakkersuisup Aningaasaqarnermut Ataatsimiititaliamit apeqqut una akissuteqarfigivaa:

“Napparsimasuni timmisartukkut angallassinasuarnernut isumaqatigiissutit nutaat 2006-imi januarip aallaqqaataaneersut tunngavigalugit, Aningaasaqarnermut ataatsimiititaliap AIS06-II-mi aappassaaneerqarneranut isumaliutissiissut qupp. 83-imiittoq naapertorlugu, angallassinasuarnernut aningaasartuutit qaffariaataasa killilerneqarnissaat iluatsinnikuua.”

Aammattaq Peqqissutsimut Avatangiisinullu Naalakkersuisoq 2006-imi 8. marts Aningaasaqarnermut Ataatsimiititaliamik isumasioqateqarnermi ilaatigut akissuteqarpoq ataatsimiititaliamit apeqqummut ima oqaasetalimmut:

”Peqqinnissaqarfiup maanna angallassinissamut taassumaluunniit ilaanut Air Greenlandimik isumaqatigiissusiaanut Greenland Ressources neqerooruteqarnikuua? Taamaattoqassappat kissaatiginarpoq Greenland Ressource-ip isumaqatigiissuteqarfigineqannginnissaanut suna tunuliaqutaanersoq paasissutissiissutigineqassasoq. Taamatuttaaq kissaatiginarpoq ilisimatitsissutineqassasoq kina/kikkut aamma suliassamut neqerooruteqarsimanersut.” 6. marts 2006-imi Aningaasaqarnermut ataatsimiititaliap Peqqissutsimut Avatangiisinullu Naalakkersuisumut apeqqutaa 7.10 innersuussutigineqarpoq. Aningaasaqarnermut Ataatsimiititaliap piunasaqaataa naapertorlugu apeqqummut akissummut saqqummiussissummik suliarinnittoqarnikuuvoq.

Aningaasaqarnermut Ataatsimiititaliap apeqqutaani siuliani pineqartuni akissutini Otto Jeremiassenip apeqqutigisai isumaqatigiissutit taakku aamma pineqarput. Taamaattumik allakkat ataani Otto Jeremiassenip apeqqutaasa akissuteqarfigineqarnerini Aningaasaqarnermut ataatsimiititaliamit apeqqutinut akissutit issuarneqarput, ilaatigut taakku Otto Jeremiassenip apeqqutaanut naapertuummata.

Tamanna kinguliini Inatsisartunut ilaasortap Otto Jeremiassenip apeqqutai aalajangersimasut akissuteqarfigineqarput.

Apeqquut: Taamani nutaamik isumaqatigiissusiornermiit aningaasartuutit qanoq ineriartorsimappat?

Akissut:

Isumaqatigiissutit atuutilersinneqarput januarip aallaqqaataani 2006-imi. Peqqinnissaqarfik ukiuni siuliini isumaqatigiissusiorfiusuni aningaasaliissutinik aalajangersimasunik pisarpoq, taakkulu ataatsimut isigalugit Aningaasaqarnermut Pisortaqaarfimmit akissarsiat akillu aaqqiivigineqarnerinut atatillugu taamaallaat aaqqiivigineqartarput. Taamatut aqutseriaaseqarneq aamma 2006-imi aningaasaliissutinut tunngavigineqarpoq. Peqqinnissaqarfiup kiffartuussinerit maani aamma nunani allani pisiarisariaqartagaasa amerlasuut akitigut ineriartornerat akit nalinginnaasumik ineriartornerinut naleqqiullugit qaffasinnerummata, Peqqinnissaqarfik aningaasartuutitigut qaffakkiartornermik nalaanneqarpoq.

Apeqquut . Siornamut sanilliussilluni qanoq aningaasartuutit annertutigippat?

Akissut:

Peqqinnissaqarfiup napparsimasunik angallassisarnermut aningaasartuutaasa matussuserneqarnissaannut Inatsisartut immikkut aningaasaliissuteqarneq ajorput. Angalanermut aningaasartuutit Peqqinnissaqarfimmut aningaasaliissutinut arlalinnut aningaasartuutaasutut nalunaarsorneqartarput, Inatsisartut kontonut immikkoortitserisarnerat naapertorlugu. Ilisimatitsissutigineqarsinnaavoq angalanernut aningaasaajaatit amerlanerit tiguneqartarmata 32.10.03-mit Napparsimasut nunani allani katsorsarneqartarnerat, timikkut nappaatit, 32.10.07-mit Kalaallit nakorsiartut najugaqarfiat, 32.11.03-mit Ataatsimut aningaasartuutit, napparsimasunik angallassinert il.il., aamma 32.11.04-mit Najukkani peqqinnissaqarfiit, nakorsanit passunneqarneq. Aningaasaliissutit annertussusii ataasiakkaat qanorlu atorneqarnerat Inatsisartut Aningaasanut inatsisaanni akuerineqartuni atuarneqarsinnaapput.

Aammattaaq siuliani apeqquummut akissutaasoq innersuusutigineqarpoq.

Aammattaaq ilisimatitsissutigineqarsinnaavoq 2005-imi aamma 2006-imi napparsimasunut angallassinernut aningaasartuutit katillutik 61,3 mill. kr.-iullutillu 63,9 mill. kr.-iummata. Taakkunanit napparsimasunik angallassinasuarnernut aningaasartuutit katillutik 24,1 mill. kr.-iullutillu 28,3 mill. kr.-iupput.

Napparsimasut angallanneqartut amerlassusiannut nalunaarsorneqartunut atatillugu takuneqarsinnaavoq amerlassusiat 2005-imit 2006-imut qaffariangaatsiarsimasoq. Taamaasilluni Dronning Ingridip

Napparsimmavissuanut Napparsimmavissuanillu napparsimasut timmisartukkut nalinginnaasumik aqquit atorlugit angallanneqartut 2.424-nit 3.467-inut amerleriarsimapput. Amerleriaat 43 %-i. Piffissami tassani umiarsuarmik angallanneqartut amerlassusiat ikileriarsimavoq 627-nit 124-nut, tamannalu Kitaani umiarsuarmik aqquit nalinginnaasut 2006-ip aallartinnerani unitsinneqarnerinik pissuteqarnerupput.

Nunatsinni Peqqinnissaqarfinni ataasiakkaanni napparsimasut angallanneqartut nalunaarsorneqarnikuunngillat. Napparsimasut nunami allami katsorsarneqarsinnaasutut periarfissinneqartut amerlassutsimikkut angalanerillu amerlassusaatigut 2002-mili annikitsumik ikiliartulersimapput.

Pinasuartumik angallassinerit amerlassusiat 2005-imit 2006-imut qaffariaateqarpoq 290-ini 389-inut. Qaffariaat katillugu 34 %-i.

Apeqqu: Taamani suliariumannittussarsiuussisoqarpa?

Akissut:

Aningaasaqarnermut ataatsimiititaliamut siusinnerusukkut akissut innersuussutigineqarpoq. 2006-imi februarip 21-iani Peqqissutsimut Naalakkersuisoq ima ilaatigut akissuteqarpoq:

”Peqqinnissaqarfik killiliussat aaljangersimasut eqqortinniarnerni piffissami sivisuumi angallannerup tungaatigut sipaaruteqarnissamut periarfissanik misissuinikuvoq. Taamaattumik nunami namminermit Atlantikorlu ikaarlugu timmisartuussisarnermi periarfissaasinnaasut misissoqqissaarniarlugit siunnersuisarfik avataaneersoq attavigineqarsimavoq. Nalunaarusiaq 2004-mi tunniunneqarpoq.

Aaqqiissutissatut periarfissat annertunerusumik misissorniarlugit Air Greenland attavigineqarpoq. Tamatumunnga ilaatigut pissutaavoq Air Greenland timmisartuuteqareerluni, timmisartortartuuteqarlunilu kiffartuussinermut atortuuteqareeremat, taamatuttaaq atortut allat kissaatigineqartut periarfissaannginneranni Air Greenland assartuussinissamut neqerooruteqarnissamut allatigut periarfissaqarmat. Atlantikoq ikaarlugu pinasuartumik napparsimasunik timmisartuussinermut Air Greenlandip kiffartuussisartui/suleqatai akuersissuteqartoqareerneratigut ingerlatissamik Air Greenlandip akigitittagaasa assinganik periarfissaqarputtaa. Taamaalilluni Air Greenlandimik suleqateqarnikkut pinasuartumik pitsaasumillu aaqqiissuteqarsinnaaneq periarfissaalernikuvoq.

Air Greenland Peqqinnissaqarfik sinnerlugu Danmarkip kiisalu Kangerlussuup, Narsarsuup aamma Keflavikip akornanni pinasuartumik napparsimasunik timmisartuussisarnermut neqerooruteqartitsisimavoq.

Timmisartortitseqatigiiffiit sisamat neqerooruteqarsimapput. Aammattaaq Air Greenland suleqatigalugu nunami namminermit angallassinermut isumaqatigiissusiornissami aaqqiissuteqarnissamut periarfissat assigiinngitsut misissoqqissaarneqarput, tamatumannittaag Peqqinnissaqarfimmut timmisartup ataatsip arlallilluunniit toqqaannartumik periarfissaasinnaanera/-t misissorneqarluni. Kiisalu aaqqiissuteqarnissamut periarfissamut taarsiullugu Air Greenlandip pinasuartumik napparsimasunik timmisartuussisarnerani atuutereersumut nalunaaquttap akunnerinut aalajangersimareersunut ukiumut aalajangersimasumik akiliteqarsinnaanermut periarfissaq misissorneqarpoq.

Air Greenlandimik suleqateqarnikkut 2006-imi januarip aallaqqaataanit nutaamik isumaqatigiissut atuutilersinneqarpoq, tamatumalu kingunerisaanik danskeq timmisartuussisartoq Atlantikoq ikaarlugu pinasuartumik napparsimasunik timmisartuussisarnermut akisussaasuulissaaq, ilutigaluguli periarfissatut misissoqqissaarneqarpoq Air Greenlandip King Air B200-tertik Peqqinnissaqarfimmut ukiumut nalunaaquttap akunnerini aalajangersimasuni attartortissinnaaneranut tunngasoq.

Danskit timmisartuussisartuat Atlantikoq ikaarlugu pinasuartumik napparsimasunik timmisartuussisarnermut atorneqartareerpoq, siumoortumillu Air Greenlandimik akuerineqareerlutik, timmisartuuteqarput amerlassutsimikkut eqaatsumillu atorneqarsinnaasunik, kiisalu nakorsaasarnermut atortuuteqarput Air Greenlandimittaaq atorneqartartunik, tamatumalu kingunerisaanik angallassinerep nalaani napparsimasooq akiummut allamut nuuttariaqarani.

Danmarkimut pinasuartumik napparsimasunik angallassisarnermi Keflavikip periarfissaalernera isumaqatigiissuteqarnikkut ammaanarpoq, tamanna aningaasaqarnikkut pitsaanerusutut isigineqassagalarpat.

Air Greenlandimik King Air-ip attartorneqarsinnaaneranut isumaqatigiissummi pisariaqartinneqarpat soorlu Ilulissanut Narsarsuarmulluunniit aalajangersimasumik timmisartuussisinnaaneq periarfissaavortaaq. Taamatut aalajangersimasumik timmisartuussisarnermi napparsimasut akiummik angallanneqartut salliutinneqartarput.

Atlantikoq ikaarlugu pinasuartumik napparsimasunik timmisartuussisarnermi timmisartuutileqatigiiffiup aalajangersimasup ataavartumik atorneqarnissaanut isumaqatigiissuteqarnermi, aamma Air Greenlandimit nalunaaquttap akunnerini aalajangersimasuni atuinissamik pinsikkut pisariaqartutigut attartortarnermi nalinginnaasumik akigitittakkamut naleqqiullugu sipaaruteqarsinnaaneq periarfissaalersimavoq.

Peqqinnissaqarfimmi napparsimasunik timmisartunik angallassisarnerup ingerlanneqarnissaanut Air Greenlandimik isumaqatigiissuteqarnerup saniatigut, Peqqinnissaqarfik Air Greenlandip bilitsilerisarfianik toqqaannartumik qarasaasiakkut inniminniisinnaanermik angalatitseqatigiiffik aqquqigalugu isumaqatigiissuteqarpoq. Aningaasartuutunik ikililerinissap saniatigut isumaqatigiissut napparsimasunut pisussinnaasunut angallassinikkut iluaqutissiivoq. Inniminniisarnikkut isumaqatigiissuteqarnermi Peqqinnissaqarfik napparsimasunut pisussinnaasunut tusindilinnut arlalinnut ukiut tamaasa aqquqit nalinginnaasut atorlugit Nuummumut Nuummillu angalasartunut piffissaalluarallartillugu timmisartumi inissanik inniminniisinnaanngorsimavoq.

Isumaqatigiissutip tigussaasumik kingunerivaa napparsimasut amerlanerit bilitsit aappalaartut atorlugit kinguneqarluartumik angalasinnaanngormata, taakkumi nalinginnaasumik bilitsinit akikinnerupput. Angalanernut ullunut aalajangersimasunut pituttuinertaqaanngitsumik inniminiisoqarsinaanngorsimavoq, tamannalu katsorsaanissat ataasiakkat pilersaaruserneqarnerannut pitsaanagerusumik periarfissiivoq. Toqqaannartumik qarasaasiakkut inniminiisalernikkut aamma pinasuartumik angallassisarnerit amerlassusiat killilersimaarneqarsinnaanngorpoq, napparsimasut pisussinnaasut Nuummumut aqquqit nalinginnaasut atorlugit angallannissaannut sivikitsumik piffissaliinikkut Peqqinnissaqarfik annertunerusumik periarfissaqalerma.

Taamaalilluni isumaqatigiissut napparsimasunut Peqqinnissaqarfimmullu pitsaasorujussuuvoq, tamatumani angallassinasuernerit akissajaataaqisut pinngitsoorneqarsinaanngormata, taamatuttaaq Dronning Ingridip Napparsimavissuani agguaqatigiillugu piffissaq innangaffiusartoq isumaqatigiissuteqarnikkut annikillisinneqarsinnaasimalluni.

Qarasaasiakkut toqqaannartumik inniminniisinnaanermut periarfissaq atorunnaarpoq, Air Greenland 2007-imi bilitsinik Internetsikkut inniminiisalerneq atulermagu.

Apeqqu: Tamaattoqarsimappallu kikkut neqerooruteqarpat ?

Akissut:

Aningaasaqarnermut ataatsimiititaliamut siusinnerusukku akissut innersuussutigineqarpoq. 2006-imi martsip arfineq pingajuani Peqqissutsimut Avatangiisinullu Naalakkersuisoq isumasioqatigiinnermi saqqummiussissutimini ima ilaatigut akissuteqarpoq:

”Ilisimatitsissutigisinnaavara Greenland Resources a/s Kalaallit Nunaanni aamma Kalaallit Nunaata Danmarkillu akornanni napparsimasunik

angallassisarnermut 14. januar 2005-imi isertuuttariaqakkamik neqeroorummik nassitsinikummat. Aallaqqaasiussami takuneqarsinnaavoq Greenland Resources-imit neqeroorut akikinnerusoq paasinarsissagaluarpat, Greenland Resources-ip neqeroorutip timitalernissaanut pisussaasutut misigisimanavianngitsoq. Taamaattumik Peqqinnissaqarfiup Greenland Resources-imit neqeroorut allanit neqerooruteqartunut naleqqiullugu neqeroorutitut ilumoorunneqartutut misigisimangilaa.

Aammattaq Peqqinnissaqarfimmit pingaartinneqarpoq suleqataalersussaq aningaasatigut tatiginartumik inissisimassasoq, pinasuartumik napparsimasunik angallassinermut misilittagaqassasoq, Peqqinnissaqarfimmik isumaqatigiissuteqaratarnikkut timmisartuuteqarnikkut suleqatigiinnissamut isumaqatigissuteqarnermi killilimmik taamaallaat pituttugaassasoq kiisalu Kalaallit Nunaanni sulusalinnik timmisartuussisarnermi atugassarititaasunut misilittagaqartuussasoq. Peqqinnissaqarfimmit nalilerneqarpoq Greenland Resources-imit pisariaqartitat tamakku naapertorneqarsinnaangitsut.

Aammattaq Greenland Resources-imut neqeroorummi piumasarineqartut immikkuualuttui malinneqanngillat, tamatumani Peqqinnissaqarfimmit neqeroorummi kissaatigineqarmat napparsimasunik pinasuartumik angallassisarneq pingaarnertut salliutinneqassasoq. Piumasarineqarportaaq neqeroorummi nunami namminerimi aamma nunanut allanut napparsimasunik timmisartuussisarnerit immikkoortinneqassasut. Greenland Resources ataatsimoortumik neqerooruteqarpoq, tassani nunami namminerimi sulusalimmik napparsimasunik angallasserit aamma Kalaallit Nunaata Danmarkillu akornanni akiutilerluni angallanneqartut ataatsimoortinneqarlutik.

Oqaatigineqartutut Peqqinnissaqarfimmut pingaaruteqarpoq ilaatigut pingaartumik napparsimasunik pinasuartumik angallassinermut pitsaaneruserumik atugassaqaartitsisoqarsinnaanera, ilaatigullu Kalaallit Nunaanni napparsimasunik angallassinermi atugassaritaasunut ilisimasaqarluarnikkut misilittagaqarluartumik suleqateqalersinnaaneq kiisalu timmisartunik periarfissaqaartitsilluartumik. Mianerisassaq tassaasimavoq tassaallunilu akitigut pitsaasumik isumaqatigiissuteqarneq napparsimasunut sillimaniartitsinikkut ajoqutaassanngitsoq. Taamaattumik Air Greenland taamaallaat saaffigineqarpoq.

Atlantikoq ikaarlugu pinasuartumik napparsimasunik timmisartuussisarnermut atatillugu ingerlatseqatigiit arlaliupput Peqqinnissaqarfiup sillimaniarnermut piumasagaataanut naapertuisinnaasut. Taamaattumik pingaaruteqarpoq nunanut allanut nunamilu namminerimi pinasuartumik napparsimasunik timmisartuussisarnerit avissaartillugit neqeroorutunik pisarnissaq. Peqqinnissaqarfik timmisartunik angallassisarnermut misilittagaqanngimmat misilittagaqarusunngimmallu Air Greenland Peqqinnissaqarfik sinnerlugu siumut piumasagaatit

tunnavigalugit neqerooruteqartitsivoq. Katillutik timmisartortitseqatigiit sisamat neqerooruteqarput. Timmisartortitseqatigiit sisamat tassaapput Air Alsie, North Flying, Flex Flight aamma DRF (Deutsche Rettungsflugwache). Neqeroorutinit tiguneqartunit pilerinarnerpaaq Air Alsie-meersuuvoq, timmisartortitseqatigiiffillu taanna Peqqinnissaqarfimmit suleqatigineqartareerpoq. Taamaattumik neqeroorummi tiguneqartumi atugassarititaasut maannamut isumaqatigiissummit pitsaaneruseqarpoq. Aammattaaq neqerooruteqartut ilaannik ataatsimik isumaqatigiissuteqartoqarpoq, taanna timmisartumik atugassaqartitsissaaq piffissap akuerineqarsinnaasup iluani pingaarnertut isumaqatigiissuteqarfigisaq pinasuartumik napparsimasunik timmisartuussisinnaatinnagu.”

Apeqqu: Neqeroortoqarsimappallu akitigut qanoq neqeroorutit nikingassuseqarpat?

Akissut:

Soorlu siuliani akissummi takuneqarsinnaasooq neqeroorutip pilerinarnerpaap toqqarneqarneranut ataatsimut nalilersuineq pissutaavoq. Taamaalilluni timmisartortitseqatigiit ataasiakkaat pissutsitigut periarfissiissutigisinnaasaasa assigiinngissutai pillugit kisitsisitigut tunniussisinnaaneq ajornakusoorpoq, tamatumani ilaallutik timmisartortitseqatigiit angissusiat sungiussisinnaassusiallu, timmisartortitseqatigiit timmisartut aamma timmisartuni aquttut qassit piginerai, napparsimasunik pinasuartumik angallassinermi ingerlatseqatigiiffiup suut misilittagarinerai, nunani tamalaani akuerisaasumik timmisartut suut periarfissarititaanersut, atortorissaarutit ”life-port”-it, sulianut ilinniarsimasunik nakorsanik niviarsianillu periarfissaqartitsineq minnerunngitsumillu piffissami timmisartortitseqatigiinnik kalerrisaarilernermi timmisartunik taakkulu aquttuunik aamma ”napparsimasunut paaqqutarinnittussanik” piareersimatitsisinnaanermut piffissaliunneqartumut tunngasut. Taamaakkaluartorli pissutsit tamakku pingaarutilittut isigineqarput.

Aammattaaq 2006-imi martsip arfineq pingajuani Peqqissutsimut Avatangiisinullu Naalakkersuisup Aningaasaqarnermut Naalakkersuisumut akissutaa innersuussutigineqarpoq, tassani assigiinngissutsit kisitsisitalersorneqariaralutik. Ilaatigut Naalakkersuisumit oqaatigineqarpoq:

”Oqaatigineqartutut Peqqinnissaqarfimmut pingaaruteqarpoq ilaatigut pingaartumik napparsimasunik pinasuartumik angallassinermut pitsaaneruseqarpoq atugassaqartitsisoqarsinnaanera, ilaatigullu suleqateqalersinnaaneq Kalaallit Nunaanni napparsimasunik angallassinermi atugassarititaasunut ilisimasaqarluarnikkut misilittagaqarluartumik timmisartunillu periarfissaqartitsilluartumik. Mianerisassaq tassaasimavoq

tassaallunilu akitigut pitsaasumik isumaqatigiissuteqarneq napparsimasunut sillimaniartitsinikkut ajoqutaassanngitsoq.

Akissummittaaq tassani Naalackersuisoq ima ilisimatitsivoq:

”Neqeroorutinit tiguneqartunit pilerinarnerpaaq Air Alsie-meersuuvoq, timmisartortitseqatigiiffillu taanna Peqqinnissaqarfimmit suleqatigineqartareerpoq. Taamaattumik neqeroorummi tiguneqartumi atugassarititaasut maannamut isumaqatigiissummit pitsaaneruseqatigineqartareerpoq. Aammattaaq neqerooruteqartut ilaannik ataatsimik isumaqatigiissuteqartoqarpoq, taanna timmisartumik atugassaqaqtitsisassaaq piffissap akuerineqarsinnaasup iluani pingaarnertut isumaqatigiissuteqarfisaaq pinasuartumik napparsimasunik timmisartuussisinnatinnagu.”

Toqqaannarmut tunngavissat taamaalillutik kisitsisitalersorneqanngillat, Naalackersuisullu akissuteqaatigeriigaanik eqqorneruseqatigineqartareerpoq. Aamma Air Alsie neqerooruteqartunit allanit piumaneqarnerunera pillugu allaannerussuteqarneralu eqqorneruseqatigineqarsinnaanani. Taamaattumik siusinnerusukkut akissutigineqartoq innersuussutigineqarpoq, takuuk siulianiittoq.

Neqeroorutigineqartut isertuussisussaataaneq tunngavigalugu tunniunneqarmata neqeroorutini aalajangersimasumik imaritinneqartut paasissutissiissutigineqarsinnaanngillat. Apeqquteqartuminngaanniit apeqqutinut akissutigineqartut Naalackersuisut Siulittaasuata Naalackersuisoqarfiani inatsisit pillugit allattoqarfimmut saqqummiunneqarnikuupput, tassannilu pisortaq Jørn Birk Olsen ilaatigut oqarasuaatikkut ilisimatitsivoq, Namminersornerullutik Oqartussat isumaqatigiissuteqartumut peqataaneranni neqeroorummut tunniunneqarsimasumut atatillugu aamma neqeroorut tunngavigalugu isumaqatigiissummut atatillugu, naalackersuinikkut tunngasutigut partii isumaqatigiissutip imarisaannik apeqqutilliisoq peqataasut pingajuattut isigineqartariaqartoq. Taamaalilluni suleqatigiit akornanni isumaqatigiissut isertuussisussaataanermik tunngaveqartillugu, suleqataasut pingajuat paasissutissanik taakkuninnga pisinnaatitaanngilaq.

Taamaattorli ilisimatitsissutigineqarsinnaavoq neqerooruteqartut akornanni timmisartut assersuunneqarsinnaasut akitigut assigiinngisitsimmata. Aammattaaq ilisimatitsissutigineqarsinnaavoq akit nikingassuteqarneranni Air Alsie pitsaanertut inissisimasoq.

Inussiarnersumik inuulluaqqusillunga

Arkalo Abelsen,
Ilaqtariinnut Peqqissutsimullu Naalackersuisoq